

Aruba, laga nos rescata edificio di Sociedad Bolivariana!

Skirbi pa Clyde Harms

TRES aña pasa mi a skirbi e articulo aki, pero absolutamente nada a wordo haci! E edificio di Sociedad Bolivariana ta sigui deteriora, un ruina sushi y mahos den un barrio asina limpi y elegante. Un contraste tristo cu e Plaza Betico net su dilanti. Awor cu e antiguo John F. Kennedy School ta keda restaura, e mahos bista di e edificio ta resalta mas cu nunca. Mi ta spera cu e Gobierno actual lo tuma pasonan necesario pa haci e edificio di Sociedad Bolivariana un otro joya arkitektonico riba nos isla stima. Sede di Aruba Symphony Festival! LeerOrkest? Aruba Youth Symphony Orchestra?

Despues di un lucha cu a dura 6 aña, december 17, 1944, Sociedad Bolivariana porfin a celebra inauguracion di nan propio edificio. Un joya di edificio cu pa hopi aña tabata nos centro di cultura y un lugar pa conferencia y convencionnan.

E edificio di Sociedad Bolivariana tabata sede pa presentacion di obranan teatral cu artistanan local; pa declamacion di poetanan local y stranhero; pa recitalnan cu musiconan mundialmente renombra y pa exhibicion di obranan di artistanan plastico internacionalmente reconoci. Entre e convencionnan internacional tabatin esnan di Rotary Club y di Lions Club, e Comision di Caribe, e Organizacion Turistico di Caribe, y di Scouts Regional.

Dos recital cu ami a presencia personalmente tabata di Yehudi Menuhin, e violinista Americano di tata y mama



Edificio di Sociedad Bolivariana 1962

Belaruso y di Nicanor Zabaleta, e harpista Spaño. Entre e otro artistanan mundialmente renombra cu a yega di toca riba e podium di e edificio di Sociedad Bolivariana tabata Bertha Singerman (cantante Argentino naci na Belarusia), Richard Tauber (tenor Austriaco) y e rumannan Adolfo (cello) y Ricardo (fiyo) Odnoposoff, Argentino – Austriaco.

Riba e mesun podium a yega di haci presentacion e famoso Niños cantores de Viena (Wiener Sängerknaben) y e Don Cossack Choir forma pa exiliadonan Ruso na Turquía.

Ta n'e edificio di Sociedad Bolivariana a introduci e celebracion di Dia di Mama na Aruba cu e designacion di Frederica "Shon Chie" Eman, viuda di e legendario John G. Eman, como e mama di aña 1945.

E edificio di Sociedad Bolivariana berdaderamente ta un icono cultural cu balor historico inmenso pa Aruba. Pero e edificio ta den decadencia, un bista tristo y mahos. No ta bay dura mucho mas pa nos mira bulldozer basha e edificio abou si e no wordo rescata.

Sigui na pagina 15>

<Continúa di página 14

CON POR RESCATA E EDIFICIO?

Supuestamente e ta di *Bolivariaanse Vereniging van Aruba*, un entidad huridico cu su derechonan manera tur ciudadano. Pero mescos cu tur ciudadano, e Vereniging tin su obligacionnan tambe. Y evidentemente, e no ta cumpli cu nan. Cua te ultimo reunion di miembronan cu e Vereniging a tene? Kendenan ta den directiva cu mester representa e asociacion “in en buiten rechten”? Como e edificio supuestamente ta wordo uza “ten algemene nutte” e ta haya dispensacion di grondbelasting. Cuanto aña caba e edificio aki no a sirbi “ten nutte” di nada, pero supuestamente e ta sigui cu e dispensacion di e belasting.

Na cuminsamento di e aña aki (2016), despues di ricibi hopi keho di bisiñanan, Serlimar mester a haci un limpieza grandi di e edificio y tereno rond di dje. Ora di cobra p’e gastonan, ningun hende a acepta responsabilidad, asina cu Serlimar mester a guli e gastonan. Manera cosnan ta bay, lo bin otro ocasion cu Gobierno mester incuri gastonan cu e propiedad ey, y atrobe ta pueblo lo mester paga e gastonan.

Si nada wordo haci cu e edificio, e lo bay perdi. Esaki lo ta un dia tristo pa nos isla. Considerando cu e edificio no ta wordo uza debidamente y ningun hende ta responsabel pe, mi ta urgi nos Gobierno tuma over e cuido di e edificio y pas’e pa Monumentenfonds. Un miembro di e Fonds a scirbi mi: “E edificio sigur ta bin na remarke pa ta riba e monumentenlijst: tanto pa su edad, su historia, su funcion cultural y siguramente pa su arquitectura”. Y si Monumentenfonds mester di financiering, mi ta sigur cu den sector priva lo por haya ayudo pa restaur’e y oper’e na beneficio di nos bida cultural.



Edificio di Sociedad Bolivariana 2016. Imponente ainda pero den estado deplorabel. Bentananan kibra, dak putri y murayanan cu ta sclama pa un man di verf, ta forma un mahos bista den un parti elegante di Oranjestad.

Esaki lo cumpli cu e deseonan di e miembronan di e Bolivariaanse Vereniging van Aruba cu a lucha 6 aña asina duro pa logra e edificio y asina Aruba lo honra nan trabou di casi 80 (ochenta) aña pasa.

E abuelo di nos actual (2016) Ministro di Cultura tabata entre e miembronan. (2019-E Minister tin otro portefeuille actualmente).

Restaura e edificio, pone airco y haci lo necesario pa converti’e atrobe den un lugar caminda cultura lo resalta! Pa hopi actividad cultural, Cas di Cultura ta mucho grandi. E sala chikito na Cas di Cultura no tin e accoustiek cu tin den e edificio di Sociedad Bolivariana cu ademas, ta conta cu un porch grandi den e di dos piso cu por wordo converti den un “grand café” cu terasa.

E edificio ta ofrece hopi alternativo pa su uzo.

Nos musico, pianista y medico, Dr. Livio Hermans tambe ta soña di mira e edificio recobra su dianan di gloria. Mi tin entendi cu tin un grupo local cu ta cla pa inverti lo necesario pa restaura e edificio. Mescos cu dr. Hermans, nan tambe ta kere cu e edificio atrobe por bira un centro cultural mahestuoso y cu ta agrega balor na nos isla como destino turistico. No ta mal idea pa haya nan como partner den un proyecto asina. Esaki ta un oportunidad unico y nos Gobierno no por lag’e bay perdi! Laga nos rescata e edificio di Sociedad Bolivariana y salba un icono di nos cultura di siglo pasa.

clydeharms@yahoo.com